



JUDICIAL **SISTEM** MONITORING PROGRAMME
PROGRAMA DE MONITORIZASAUN DO **SISTEMA** JUDISIAL

Komunikadu Imprensa

Períodu : Feveireiru 2012
Edisaun : 05 Marsu 2012

Arguidu ba kazu tentativa abuzu seksuál hetan moldura penál tinan 6 (neen) iha prizaun

Iha loron 28 Feveireiru 2012, Tribunál Distritál Suai hala'ó prosesu julgamentu hodi rona depoimentus husi testamuña ba kazu abuzu seksuál ba minoridade ne'ebé rejista ho númeru prosesu 06/PEN/2010/TDS. Arguidu ba kazu ne'e ho inisiál FdC hasoru vítima MS. Kazu ne'e akontese iha loron 30 Dezembru 2009, iha Suco Matai, Sub Distritu Maukatar, Distritu Covalima.

Prosesu julgamentu hala'ó ho kompozisaun Juízes kolektivu ne'ebé kompostu husi Dr. Álvaro Maria Freitas ne'ebé sai hanesan prezidênte, akompaña husi Dr. Costânção Barros Basmery no Dra. Florença Freitas, Ministériu Públiku representa husi Dra. Zélia Trindade no arguidu hetan defeza husi Dr. Marçal Mascarenhas husi Eskritóriu Defensória Públiku.

Diretór ezekutivu JSMP, Luis de Oliveira Sampaio, haktuir katak *aktu krime ne'ebé arguidu komete ne'e aktu ne'ebé grave tanbá komete hasoru vítima ho idade minoridade, tanbá ne'e husu ba tribunál kompetente hodi hamonu pena ne'ebé justu bázeia ba krime ne'ebé mak arguidu komete, atu bele proteze labarik sira husi kualker karakter violénsia ne'ebé afeita ba sira nia futuru.*

Tuir testamuña ho inisiál PJB ne'ebé tribunál notifika, haktuir iha nia depoimentu katak, iha loron 30 Dezembru 2009 mais ou menus tuku 10.00 dader testamuña rona vítima hakilar no hasai lia fuan maltrata ba arguidu. Tanbá ne'e, testamuña hakbesik ba haree arguidu tuur hela iha hadak leten, no vítima deklara ba testamuña katak arguidu obriga atu halo relasaun seksuál ho nia.

Relasiona ho faktu hirak ne'e, iha Ministériu Públiku ninia alegasaun finál haktuir katak, bázeia ba depoimentu testamuña husi testamuña no deklarasaun vítima nian iha leten, Ministériu Públiku kontinua mantein nafatin ninia akuzasaun kontra arguidu konabá krime abuzu seksuál ba vítima ne'ebé mak ho idade minoridade.

Pozisaun Ministériu Públiku ne'e, bázeia ba artigu 23 no 24 Kódigu Penál konjuga ho artigu 177 Kódigu Penál Timór Léste, konabá abuzu seksuál ba menór. Iha alegasaun finál, Ministériu Públiku, husu ba tribunál atu kondena arguidu ho pena tinan 6 iha prizaun.

Mesmu nune'é, tuir JSMP nia observaun nota katak parte defeza ható ba tribunál bázeia ba arguidu nia deklarasaun katak la komete krime hanesan deskreve iha akuzasaun laran. Liu tan, tuir defensór arguidu katak entre vítima ho arguidu relasaun namoradu. Bazeia ba konsiderasaun hirak ne'e parte defeza solisita ba tribunál atu absolve arguidu husi akuzasaun Ministériu Públiku nian.

Tanbá ne'e, JSMP enkoraza nafatin ba tribunál atu tetu no konsiderasaun tuir faktu hirak ne'e, hodi fó justisa ne'ebé mak justu ba ema ne'ebé sente afetadu ho akontesementu ne'e, atu nune'é bele justifika ba públiku tomak, liu-liu comunidade sira iha jurisdisaun refere katak tribunál nu'udar fatin no sentru atu proteze no garante justisa ba ema hotu.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883